

6713443

078
18

2821

光州志

光州志卷之八

光州直隸州知州楊修田總纂

仕賢列傳

春秋

孫叔敖

孫叔敖莊王九年薦賈見敖於王旣而隱於民間不仕爲
楚相虞邱子所知復薦於王以爲令尹三月爲楚相施教
導民上下和合世俗盛美政綏禁止吏無奸邪盜賊不起
秋冬則勸民山採春夏以水名得其所使民皆樂其生嘗
決期思之水以灌雩婁之野儲粟無算敖臨終戒其子曰

王數欲封我我辭不受我死必封汝汝無受利地荆楚間有寢邱者其爲地不利前有妬谷後有戾邱其名惡可長有也其子從之請以封楚功臣封二世而收唯寢邱不奪

節前志

戰國

黃歇

春申君者楚人也名歇姓黃氏游學博聞事楚頃襄王頃襄王以歇爲辯使於秦黃歇受約歸楚楚使歇與太子完入質於秦秦留之數年楚頃襄王病太子不得歸因變衣服爲楚使者御以出關而黃歇守舍常爲謝病度太子已

遣秦不能追歇乃自言秦昭王曰楚太子已歸出遣矣歇
當死秦遣黃歇歇至楚三月楚頃襄王卒太子完立是爲
考烈王考烈王元年以黃歇爲相封爲春申君賜淮北地
十二縣

州舊志載州境卽在所賜十二縣中今州治其遺宅也故向收入州志中

節史記

三國吳

胡綜

胡綜字偉則汝南固始人也少孤母將避難江東孫策領
會稽太守綜年十四爲門下循行留吳與孫權共讀書策
薨權爲討虜將軍以綜爲金曹從事從討黃祖拜鄂長吳
將晉宗叛歸魏魏以宗爲霸春太守去江數百里數爲寇

害權使綜與賀齊輕行掩襲生虜得宗加建武中郎將綜有知人之明凡自權統事諸文誥策命鄰國書符畧皆綜之所造也赤烏六年卒子冲平和有文幹天紀中爲中書令後仕晉爲尙書郎吳郡太守

節三
國志

唐

陳 酆

陳酆字有芑先世弋陽人因祖元光戍閩有功世守漳州遂爲閩人父珣舉明經及第授翰林承旨珣生酆德性溫恭幼耽經史天寶六年舉秀才授辰州甯遠令在京見李林甫楊國忠柄國無意仕進訪弋陽舊第川原壯麗再新

而居之數年安祿山亂漳州民詣福州觀察使訴乞遵先朝舊制命陳艷領州事以拯民生朝是其請艷至漳建學延師鋤強救災一如其祖守漳時

節舊志

方竦

方竦字仲成弋陽人景雲初舉進士累官鸞臺侍郎開元中封禪命爲禮儀使竦蒐舉典故容止閑雅元宗歎其知禮封雲亭侯

節舊志

王審邽

王審邽字次都潮弟也爲泉州刺史善儒術通春秋明吏治流民還者假以牛犁與完廬舍中原亂公卿多來依之

如楊休鄭璘韓偓傳懃楊贊圖鄭戩等賴以免禍審邦遣
子延桺作招賢院以禮之節唐書

宋

李虛己

李虛己字公受光州人舉進士天聖間知池州有政聲民
多懷之存舊志

許將

許將字冲元福州閩人舊志載爲固始人或將致政後老
於固始遂收爲固始人歟嘉祐八年舉進士第一歐陽修
讀其賦謂曰君辭氣似沂公未可量也章惇爲相與蔡卞

同肆羅織貶謫元祐諸臣奏發司馬光墓哲宗以問將對曰發人之墓非盛德事方黨禍作或舉漢唐誅戮故事帝復問將對曰二代固有之本朝治道所以遠過漢唐者以未嘗輒戮大臣也哲宗皆納之卒年七十五贈開府儀同

三司諡文定

節前志

許份

許份字子大以父將恩補承務郎崇寧初登甲科除秘書省校書遷實錄院檢討改國史編修論時政得失多忤時相意上皇稱善而用事者極排擯上曰將子賢能世其家朕舊知之故讒不行知蔡州兼淮東兵馬鈐轄金人再入

大州志 卷之四
四
寇份卽檄本路兵進討解亳州之圍而漕糧得至畿甸時
諸路兵入援所至或縱剽掠多不聽入州城軍士病之份
大啟城圍至者撫勞而去秋毫無犯城之圯者一新之不
一月功就金人兩至中都維揚之民晏如也紹興三年薨
年五十四

節前志

王 彬

王彬固始人淳化三年進士及第授雍邱尉時皇城司陰
遣人下畿縣恃勢貪暴彬捕鞠之得所受賄置於法自是
詔親事官毋得出都城厯知撫州州人李甲饒英武斷鄉
曲縣莫能制彬按治甲搜其家得所藏兵械龍鳳衣物坐

大逆棄市併按英強取人孥配嶺表州里肅然擢提點荆湖刑獄入判三司出爲京西轉運使累遷太常寺少卿卒

節舊志

元

馬祖常

馬祖常字伯庸世爲雍古部居靖州天山有錫里吉思者於祖常爲高祖金季爲鳳翔兵馬判官以死節贈恒州刺史子孫因其官以馬爲氏曾祖月合乃從世祖征宋留汴累官禮部尙書父潤同知漳州路總管府事曾監光州遂家馬祖常生於光七歲知學得錢卽以市書十歲時見燭

欽燒屋解衣沃水以滅火咸嗟異之既長益篤於學蜀儒
張頴講道儀真往受業其門質以疑義數十頴甚器之延
祐初科舉法行鄉貢會試皆中第一廷試爲第二人授應
奉翰林文字拜監察御史是時仁宗在御已久猶居東宮
飲酒常過度祖常上書請御正衙立朝儀御史執簡太史
執筆則雖有懷姦利己乞官求賞者不敢出口天子承天
地祖宗之重當極調攝至於酒醴近侍進御當思一獻百
拜之義英宗爲皇太子又上書請慎簡師傅於是姦臣鐵
木迭兒爲丞相威權自恣祖常知其盜觀國史率同列劾
奏其十罪仁宗震怒黜罷之祖常薦賢拔滯知無不言俄

改宣政院經歷月餘辭歸泰定建儲除典寶少監太子左贊善兼翰林直學士遷禮部尚書丁祖母憂起爲右贊善復除禮部尚書尋辭歸天歷元年召爲燕王內尉仍入禮部兩知貢舉時稱得人陞參議中書省事拜治書侍御史遷江南行臺中丞元統元年召議新政賜白金二百兩鈔萬貫又歷同知徽政院事遂拜御史中丞帝以其有疾詔特免朝禮光祿日給上尊祖常持憲務存大體西臺御史劾其僚禁酷時面有酒容祖常以苛細黜之山東廉訪司言孔氏訟事以事關名教不行按者亦引去除樞密院副使頃之辭職歸光州復除江南行臺中丞以疾不赴至元

四年卒年六十贈攄忠宣憲協正功臣河南行省右丞上
護軍魏郡公諡文貞祖常立朝既久多所建明嘗議今國
族及諸部既誦聖賢之書當知尊諸母以厚彝倫又議將
家子弟驕脆有孤任使而庶民有挽強斲張老死草野者
當建武學武舉儲材以備非常時雖弗用識者韙之祖常
工於文章務去陳言專以先秦兩漢爲法尤致力於詩大
篇短章無不可傳者嘗預修英宗實錄又譯潤皇圖大訓
承華事畧又編集列后金鑑千秋記畧以進受賜優渥文
宗嘗駐蹕龍虎臺祖常應制賦詩尤被歎賞謂中原碩儒

唯祖常云

史節元

詹士龍

詹士龍字雲卿固始人宋都統鈞子鈞歿時甫三歲元兵破鄂母胡氏北徙董忠獻公從世祖南征知都統死節告世祖且以士龍入見世祖歎曰此忠臣子汝善養之忠獻子名士選故名士龍騎射每發必中忠獻喜曰都統有後矣諸昆以螟蛉目之士龍泣訴於忠獻忠獻憫其懇誠以實告士龍卽痛哭曰爲人子不知所出非孝也爲人養而不能報非義也不孝不義其可哉他日從獵渟沲懇求改姓忠獻戲曰爾欲復姓試爲投石水中浮則爾從士龍祝曰吾父有靈石當暫浮因以石投水沉而復浮者數四忠

獻愕然曰天也遂許之忠獻薨服齊衰以報忠獻從弟忠貞公以宋臣子孫薦於中書始仕高郵興化軍擢兩淮鹽運判官旋拜江南諸處御史時巨姦擅權士龍舉劾無所避巡撫荆楚懲貪嘉善再拜廣西道僉事苦瘴癘歸曰吾城西有田可供祭祀有書可以教子孫志願畢矣

節舊志

管 禕

管禕光山人至正初以翰林厯官學士文名著於當時有

管學士集

存舊志

龔友福

龔友福光山人至正十七年舉進士第一官翰林學士拜

中書參政兼丞相事以學行著人稱爲淮南夫子而不名

存舊志

張 鉉

張鉉字用鼎光州人至正間爲奉元路學古書院山長集慶路續修景定建康志周教授謂用鼎學問老成詞章典雅必得其人事方就緒乃委本路判官周奉訓等親詣敦

請纂成金陵新志十五卷

節舊志

張安仁

張安仁光州人順帝初仕至兵部尙書後以事謫任湖廣參政值陳友諒亂歸田高卧城西與物無忤時人德之

明

劉瑄

劉瑄字從禮光山人洪武初以明經辟舉授國子監丞累官左諭德備帷幄顧問上愛其樸直所言多聽國初用法尙嚴瑄每請濟之以寬屢回上意侍高皇帝三十年凡所奏請悉多稱旨瑄秘不敢洩故凡諸建白無所見獨本省不養孳生馬天下免勾贅墾軍人知其出於瑄議也蓋當時上與瑄議養種馬於各省瑄奏河南乃百戰之場民逃土曠又多河患若又領馬則民益逃亡上可其奏故不養馬瑄雖久宦囊橐實無餘積致政後以牯牛負衣衾還鄉